

- गुप कैप्टन शुभांशु शुक्ला समेत चार ई अंतरिक्ष यात्री ऐतिहासिक एक्सियोम-4 मिशन ऊं आज पाछा धरती माथे उतर्या।
- मुख्यमंत्री भजनलाल शर्मा भ्रष्टाचार रा बधता दायरा माथे चिंता जताता थकां इण ने बरकत मांय अडचन बतायो।
- ऊर्जा मंत्री हीरालाल नागर बिजली रा स्मार्ट मीटर ने जरूरी बतायो-कह्यो-अ मीटर लगावण रो बोझ ग्राहकां माथे नी पड़ेला।
- प्रदेश मांय कठे-कठे भारी बारिश -ऊगणी हलकां मांय काल ऊं अर आतूणी हलकां मांय 18 जुलाई ऊं बरसात हल्की पड़बा रा आसार।

000

गुप कैप्टन शुभांशु शुक्ला समेत चार ई अंतरिक्ष यात्री ऐतिहासिक एक्सियोम-4 मिशन पाछे आज हिफाजत सागे धरती माथे उतर गया। इंटरनेशनल स्पेस स्टेशन माथे 18 दिन रा मिशन पाछे अ अंतरिक्ष यात्री आज दोपहरां अमरीका मांय कैलिफोर्निया तट माथे उतर्या।

प्रधानमंत्री नरेंद्र मोदी श्री शुक्ला अर ड्रैगन स्पेस क्राफ्ट री कू रा दूजा सदस्यां रो स्वागत करता थकां सोशल मीडिया पोस्ट रे जरिये मांड्यो के श्री शुक्ला वां री हिम्मत अर समर्पण ऊं भारत रा करोड़ों रेहवासियां ने प्रेरित कीना है। श्री मोदी कह्यो के देश रा मानव अंतरिक्ष उड़ान मिशन-गगनयान री दिशा मांय ओ मील रो पत्थर है।

केन्द्रीय विज्ञान अर प्रौद्योगिकी मंत्री जितेन्द्र सिंह गुप कैप्टन शुभांशु री अंतरिक्ष यात्रा कामयाबी सागे पूरी व्हेवण माथे खुशी जाहिर करता थकां इण ने देश सारु अद्भुत लम्हो बतायो।

अंतरिक्ष यात्रा ऊं पाछा आया चार ई जणा ने अब एक हफ़ता ताई न्यारा राख्या जावेला। शुभांशु शुक्ला रे 17 अगस्त ने दिल्ली पूगण री उम्मीद है। गुप कैप्टन शुक्ला अंतर्राष्ट्रीय अंतरिक्ष स्टेशन जावण वाळा भारत रा पहला रेहवासी अर साल 1984 मांय अंतरिक्ष मांय गया विंग कमांडर राकेश शर्मा पाछे भारत रा दूजा अंतरिक्ष यात्री है। शुभांशु शुक्ला अंतरिक्ष केन्द्र मांय खास सूक्ष्म-गुरुत्वाकर्षण प्रयोग कीना।

000

मुख्यमंत्री भजनलाल शर्मा लगातार बध रह्या भ्रष्टाचार रा दायरा माथे चिंता जताई है। वे आज जयपुर मांय राख्यी ज्या ए.सी.बी. रा स्थापना दिवस जळसा मांय बोल रह्या हा। श्री शर्मा कह्यो के भ्रष्टाचार तरक्की रा गेला मांय अडचन है अर इण ऊं सरकारी योजनावां फाइलां मांय दब र रह जावे है। वे कह्यो के प्रदेश मांय भ्रष्टाचार ने बिल्कुल बर्दाश्त नी करण री नीति माथे काम कर्यो जा रह्यो है। मुख्यमंत्री अहलकारां ऊं दबाव मांय आया बगैर काम करण री अपील करता थकां कह्यो के कोई ई कानून ऊं ऊंचो नी व्हे है।

मुख्यमंत्री ए.सी.बी. रा हेल्पलाइन नम्बर 1 0 6 4 रो बत्तो ऊं बत्तो प्रचार करण बाबत ई कह्यो। कार्यक्रम मांय ए.सी.बी. री कार्यवाहक महानिदेशक स्मिता श्रीवास्तव बतायो के एसीबी कानी ऊं करीजी कार्यवाहियां रा मामला मांय राजस्थान महाराष्ट्र पाछे दूजा पायदान माथे है।

000

केन्द्रीय इस्पात अर भारी उद्योग राज्यमंत्री भूपति राजू आकांक्षी जिला सिरौही मांय जिला स्तर रा अहलकारां सागे मीटिंग कर र विकास रा न्यारा-न्यारा कामां री प्रगति रो जायजो लीनो। वे राजपुरा मांय जल जीवन मिशन रा तैत कराया जा रह्या कामां रो ई जायजो लीना। श्री राजू वीरवाड़ा मांय आबूराज वाटिका अर झाड़ौली मांय राजीविका प्रशिक्षण केन्द्र रो ई दौरा कीनो।

000

रक्षा अनुसंधान अर विकास संगठन-डीआरडीओ देश मांय डिजाइन अर विकसित करी ज्या छह रणनीतिक उत्पाद आज भारतीय नौसेना ने संप्या। डीआरडीओ रा अध्यक्ष एस.वी. कामत जोधपुर री रक्षा प्रयोगशाला मांय राख्यी खास जळसा मांय रियर एडमिरल श्रीराम अमूर ने अ साज-ओ-सामान संप्या।

000

जयपुर अर उदयपुर जिलां मांय बच्चां रो पोषण स्तर सुधारबा सारू मिलेट न्यूट्री बार बांटण रो कार्यक्रम चलायी ज्यो है। दोन्यू जिलां रा चुण्यी ज्या 544 आंगनबाड़ी केन्द्रां माथे तीन ऊं छह साल उम्र ताई रा टाबर-टाबरियां ने सप्ताह मांय पांच दिन बाजरा, गेहूं, मूंगफली अर शहद ऊं बनायी ज्यी बायो फोर्टीफाइड चॉकलेट दी जावेला। उपमुख्यमंत्री अर महिला अर बाल विकास मंत्री दीया कुमारी आज जयपुर मांय विद्याधर नगर रा आंगनबाड़ी केंद्र ऊं ई पायलट कार्यक्रम री सुरुआत कीनी।

000

ऊर्जा मंत्री हीरालाल नागर बिजली रा ग्राहकां री जरूरतां ने ध्यान राखता थकां स्मार्ट मीटर री जरूरत माथे जोर दीनो है। वे आज जयपुर मांय खबरनवीसां सागे बातचीत कर रह्या हा। श्री नागर कह्यो के अ मीटर लगावण रो खर्चो केन्द्र सरकार री ओर ऊं दी जावण वाळी सब्सिडी अर डिस्कॉम री रकम ऊं निकाळ्यो जावेला। वे कह्यो के अ मीटर लगावण रो खर्चो ग्राहकां ने नी देवणो व्हेला। श्री नागर कांग्रेस माथे स्मार्ट मीटर ऊं जुड़ी सियासत करण रो आरोप मांड्यो। वे कह्यो के राज्य री लारली कांग्रेस सरकार ही स्मार्ट मीटर लगावण री सुरुआत करता थकां साढे पांच लाख स्मार्ट मीटर लगाया हा।

000

राज्य जी.एस.टी. विभाग सरिया बणावण सारू बिना बिल लोहा रो स्क्रेप ले जा रह्या दस ट्रक जब्त कीना है। प्रवर्तन शाखा री टीमां एके सागे केई ठोडां छापा मार र अ ट्रक पकड़्या। जी.एस.टी. रा मुख्य आयुक्त कुमारपाल गौतम बतायो के टैक्स कानूनां ने नी मानबा वाळां रे खिलाफ करड़ी कार्यवाही करी जावेला।

000

जयपुर मांय यातायात पुलिस ट्रेफिक नियमां रो उल्लंघन करण वाळां ऊं जुर्मानो अब ऑनलाइन तरीका ऊं वसूल करेला। पुलिस आयुक्त बीजू जॉर्ज जोसेफ बतायो के यातायात नियमां री पालना नी करण वाळां रे खिलाफ चालान री कार्यवाही कैशलेस करण रा हुकम दिया ज्या है।

000

विश्व युवा कौशल दिवस रे मौके आज करौली मांय राजस्थान कौशल अर आजीविका विकास निगम री ओर कार्यशाला राख्यी ज्यी। कार्यशाला मायं आर.एस.एल.डी.सी. रा जिला समन्वयक अभिषेक कुमार शर्मा नौजवानां ने सरकार री न्यारी-न्यारी योजनावां री जाणकारी दीनी। ई सागे ई नौजवानां ने खुद रो काम-घंधो सरु करण अर कौशल विकास ऊं जुड्या कार्यक्रमां री जाणकारी ई दीरीजी।

000

प्रदेश मांय कठे-कठे भारी बारिश अर घणखर हलकां मांय हल्की ऊं मझला दर्जा री बरसात रो दौर चल रह्यो है। मौसम विभाग आज भरतपुर, अजमेर, जोधपुर, बीकानेर अर जयपुर संभाग मांय कठे-कठे भारी ऊं

घणी भारी बिरखा व्हेवण रा आसार जताया है। काल कोटा, उदयपुर, भरतपुर अर बीकानेर संभाग मांय कटे-कटे भारी बारिश व्हे सके है। राज्य रा ऊगणी हलकां मांय 17 जुलाई ऊं जदके आतूणी हलकां मांय 18 जुलाई ऊं बिरखा रो जोर कम पड़बा री संभावना है। ई बीचे आज पाली ज़िला रा हेमावास मांय 19 सेंटीमीटर पाणी बरस्यो। तेज़ बरसात रे कारण पाली शहर री केई कॉलोनियां मांय पाणी भर ग्यो, जद के गांवाई हलकां मांय खेतां मांय पाणी भर जावण रा समाचार है। लारला चौबीस घंटां मांय भीलवाड़ा ज़िला रा बिजौलियां मांय सब ऊं बत्तो 18 सेंटीमीटर पाणी बरस्यो। चित्तौड़गढ़ ज़िला रा भैंसरोड़गढ़ मांय 17, नागौर ज़िला रा मकराना मांय 14 अर टोंक ज़िला रा निवाई मांय 13 सेंटीमीटर बरसात व्ही। मंडाना, सांभर, नावां अर परबतसर समेत केई ठौड़ां 10—10 सेंटीमीटर ऊं बत्तो मेह बरस्यो। चोखी बिरखा रे पाण राज्य मांय बंधा अर कूड़ा-बावड़ियां करीब 62 फीसदी भर ग्या है। 106 बंधा लबालब भर ग्या है जद के 407 थोड़ा-घणा भर्या है।

000

सड़क परिवहन अर राजमार्ग मंत्री नितिन गडकरी उद्योग जगत ऊं जुड़्या लोगां ऊं कॉर्पोरेट सामाजिक उत्तरदायित्व-सीएसआर रा तैत कराया जावण वाळा कामां री तादाद बधावण सारु सामाजिक-आर्थिक ऑडिट करावण री अरज कीनी है। वे आज नई दिल्ली मांय 12वां राष्ट्रीय सीएसआर शिखर सम्मेलन मांय बोल रह्या हा। श्री गडकरी कह्यो के साधनां माथे बेहतर तकनीक काम ले र गांवाई हलकां मांय मोटा बदलाव लाया जा सके है।

कार्यक्रम मांय श्री गडकरी न्यारा-न्यारा हलकां मांय सीएसआर रा तैत करी ज्या कामां सारु कंपनियां अर संगठनां ने ईनाम दे र नवाजा।

000